

"MALAMORTE"

In a notte silenziosa di u spaventu

More un cantu in lu ventu,

Cumè pè cornu viotu, murrurinu marinu,

Senti stu lagnu muvrinu !

E' l'ombra di l'alburu in u pozzu spentu

Si ne sfughje cumè pientu,

Cumè preludiu surratu da malacella,

In a fossa senza stella.

Ma tandu alza a luna u so spechju schiappatu,

Sin' i secreti di u pozzu dissuchjatu.

Ci ghjetta un stilettu !

Crechia cumu cù li to diti di fulettu,

Spacchi à sta notte parturita d'anima pitrigna

Perch'ella cunoschi matina ! ...

Domenica VERDONI



L I T E R A T U R A

Omi senza mimoria i roboti aspettavanu. Indù villutu verde culore di filetta tenera, aspettavanu. Indù sole, culore di rena chjaru, aspettavanu. Cù a grassa nant'à e so osse tagliate indù farru, i roboti aspettavanu, eranu allungati. Si "sintia" un silenziu di cimiteriu. E cosce di vetru ch'ùn eranu fattu nè da vivi nè da morti aspettavanu u mumentu duve elle s'avianu da apre per a prima volta. Eddi ùnavianu mai vistu u ghjornu. Sessuati, ma senza sessu eranu chiamati roboti ma ùnavianu micca nome, avianu i tratti di l'omu ma li mancava l'umanità, gli mancava stu pezzu d'eternità chi face u diventà di ogni persona, di ogni esse.

Eddi ùn eranu di nissun parte; E so radiche e devianu à u farru chi d'avia dattu un "ersatz" di vita. E' poi venne a minute "doppiu zeru" gradi 7003.

I chjodi di i cuperchji si misseru à vulà. A' pocu à pocu, un muvimentu si messu in marcia. Un' si sintia quasi micca è purtantu tutti l'ordinatori eranu pronti. L'ochji di vetru andavanu da manca à dritta è da dritta à manca, cumè una meccanica infernale... Eranu tutti cumè omi, vestuti di costumi d'un'epica ch'ùn era ancu vinuta. Eranu persunaggi sapientissimi da u primu à l'ultimu. Cunsigliere, di una sucetà di sterpa di l'irrazionale, avianu da fà spari quelli chi li avianu datu forma. I schjavi eranu diventati patroni. Vintimila cuperchji s'eranu apartiti. A notte era d'acciaiu è d'oliu, a vita era di focu è d'insorfanu. Eranu surtiti... A pianeta si chiamava : TERRA 7777.

Maria Lucia GIANETTI